

VENDIM
Nr. 98, datë 17.6.2016

**MBI MIRATIMIN E LICENCËS PËR VEPRIMTARINË E FURNIZIMIT TË
ENERGJISË ELEKTRIKE**

Në mbështetje të neneve 16 dhe 37, pika 2, germa “ç”, të ligjit nr. 43/2015, “Për sektorin e energjisë elektrike”, nenit 25 të Rregullave të Praktikës dhe Procedurave të ERE-s, miratuar me vendimin e Bordit të Komisionerëve të ERE-s nr. 21, datë 18.3.2009, i ndryshuar, Bordi i ERE-s, në mbledhjen e tij të datës 17.6.2016, mbasi shqyrtoi draftin e përgatitur nga grupi i punës dhe relacionin përkatës, për miratimin e licencës për veprimtarinë e furnizimit të energjisë elektrike,

VENDOSI:

1. Të miratojë licencën “Për veprimtarinë e furnizimit të energjisë elektrike” (bashkëlidhur).
2. Efektet e kësaj licence për subjektet e licencuara nga ERE në aktivitetin e furnizuesit të kualifikuar dhe furnizuesit publik me pakicë, shtrihen për periudhën e mbetur të kohës së parashikuar në licencën aktuale.
3. Drejtoria Juridike dhe e Mbrojtjes së Konsumatorit të njoftojnë aplikuesin për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

Republika e Shqipërisë
Enti Rregullator i Energjisë

LICENCË
PËR VEPRIMTARINË E FURNIZIMIT TË ENERGJISË ELEKTRIKE

Numri i licencës:

Certifikata e regjistrimit:

Seria:

Data e hyrjes në fuqi:

Licenca i jepet:

Shoqëria:

NUIS:

Detyrimi për shërbimin publik: _____

Data e hyrjes në fuqi:

Kohëzgjatja:

Furnizues i mundësisë së fundit: _____

Data e hyrjes në fuqi:

Kohëzgjatja:

Bazuar në autoritetin që i është dhënë në seksionin e dytë të pjesës së pestë të ligjit nr. 43/2015, “Për sektorin e energjisë elektrike”, Enti Rregullator i Energjisë (ERE) i jep këtë licencë (licenca), për të kryer veprimtarinë e furnizimit të energjisë elektrike (FEE) dhe/ose të furnizuesit të mundësisë së fundit ose/dhe për të përmbushur detyrimin e shërbimit publikë/universal, personit të lartpërmendur, i quajtur “i licencuari”, subjekt i kushteve të licencës të bashkëngjitura dhe pjesë integrale të saj, si dhe kushteve të përcaktuara në vendimin e Bordit të ERE-s.

Kjo licencë hyn në fuqi në datën e shkruar më lart dhe do të vazhdojë të jetë në fuqi, deri në përfundim të afatit të dhënë në rast se nuk hiqet nga ERE në përputhje me kushtet e licencës të përfshira këtu apo sipas parashikimeve të ligjit nr. 43/2015.

KRYETAR I ERE-s

Republika e Shqipërisë
Enti Rregullator i Energjisë

KUSHTET E LICENCËS
PËR VEPRIMTARINË E FURNIZIMIT TË ENERGJISË ELEKTRIKE

Seria: _____
Numri i licencës: _____
I jepet: _____
(Emri i plotë i të licencuarit)

1. Dispozita të përgjithshme

1.1 ERE është autoriteti i vetëm në Republikën e Shqipërisë, i njohur në seksionin II të ligjit nr. 43/2015, “Për sektorin e energjisë elektrike”, për të lëshuar dhe deklaruar hyrjen në fuqi të kësaj licence.

1.2 Nëse ndonjë kusht i kësaj licence bëhet nul ose i anulueshëm apo pushon së qeni në fuqi, ky kusht do të hiqet nga licenca dhe kushtet e mbetura të licencës do të vazhdojnë të jenë plotësisht në fuqi.

1.3 Asetet nuk mund të transferohen tek asnjë person tjetër pa aprovimin paraprak me shkrim të ERE-s. Përjashtim nga detyrimi për marrjen e miratimit të ERE-s për transferimin e aseteve, bëjnë rastet e parashikuara në rregulloren “Për transferimin e aseteve”. Kur aprovon një transferim, ERE mund ta ndryshojë kohëzgjatjen e licencës ose kushtet e tjera të saj.

1.4 ERE ka të drejtën ekskluzive për të modifikuar këtë licencë, në rast se kushtet dhe rrethanat kanë ndryshuar, si dhe për të përbushur dispozitat e rregullave të tregut, Kodit të Rrjetit, Kodit të Shpërndarjes, Kodit të Matjes apo akteve të tjera nënligjore të miratuara nga ERE sipas legjislacionit në fuqi.

1.5 Në këtë licencë, përfshirë kushtet e licencës dhe anekset e saj, përveç kur konteksti e kërkon ndryshe, termat e përdorur do të kenë kuptimet sipas ligjit nr. 43/2015, “Për sektorin e energjisë elektrike”, si vijon:

“Operator i rrjetit” është operatori i sistemit të transmetimit dhe/ose operatori i sistemit të shpërndarjes së energjisë elektrike.

“Person” është një person juridik.

“Shërbimi i balancimit” është sigurimi i kapacitetit rezervë i kontraktuar dhe/ose energjia elektrike balancuese, e përdorur nga Operatori i Sistemit të Transmetimit për të kryer balancimin.

“Biznesi shoqërues”, çdo biznes që direkt ose indirekt, tërësisht ose pjesërisht:

- a) është pronë e të licencuarit; ose
- b) ka të licencuarin në pronësi; ose
- c) është në pronësi të personit, i cili është pronë e të licencuarit.

“Ndërsubvencionimet”, transferim fondesh ose ndarje kostosh brenda llogarive të të licencuarit ose mes bizneseve shoqëruese për mbështetje financiare të një aktiviteti ose biznesi me koston e një tjetri.

2. Kryerja e aktivitetit të licencuar

2.1 I licencuari autorizohet nga kjo licencë për të zhvilluar aktivitetin furnizuesit të energjisë elektrike sipas legjislacionit në fuqi në Republikën e Shqipërisë.

2.2 I licencuari nuk do të vendosë për klientët e tij pagesa të ndryshme nga ato të aprovuara nga ERE sipas legjislacionit në fuqi.

2.3 I licencuari nuk do të pengojë, parandalojë ose të tentojë të parandalojë të licencuarit e tjerë ose pjesëmarrësit potencialë ose konkurrentët që të angazhohen ose të hyjnë në biznesin e furnizimit

apo në aktivitetete të tjera në sektorin e energjisë elektrike në Republikën e Shqipërisë.

2.4 I licencuari nuk do të përfshihet në ndërsbvencionime. Nëse i licencuari është një kompani vertikalisht e integruar elektroenergjitike, do t'i ndajë llogaritë e tij financiare sipas aktiviteteteve të prodhimit dhe shpërndarjes brenda afatit të kërkuar nga legjislacioni në fuqi për të mundësuar që ERE të kolaudojë se nuk ka ndërsbvencionime, aktivitete antikonkurrencë ose diskriminim.

2.5 I licencuari nuk do të përfshihet në asnjë formë aktiviteti monopol ose antikonkurrencë të ndaluar nga legjislacioni në fuqi ose rregulloret dhe rregullat e miratuara nga ERE dhe Autoriteti i Konkurrencës.

2.6 Brenda datës 31 janar të çdo viti, i licencuari do t'i dërgojë ERE-s një informacion dhe deklarata me shkrim për kryerjen e aktivitetit gjatë vitit paraardhës dhe përmbushjes së kuadrit ligjor në sektorin e energjisë elektrike.

2.7 I licencuari nuk do të bashkëpunojë me persona të tjerë për të dëmtuar interesat e të licencuarve ose klientëve të energjisë elektrike.

2.8 I licencuari do ta kryejë aktivitetin e licencuar në përputhje me parimet e transparencës, të përcaktuara legjislacioni në fuqi.

2.9 I licencuari që do të angazhohet në aktivitete të tjera të ndryshme nga aktiviteti për të cilin është licencuar duhet të informojë ERE-n në rastet kur synon, të:

- a) angazhohet në aktivitet tjetër përveç aktivitetit të licencuar; ose
- b) të ngrejë një biznes shoqërues.

2.10 ERE mund ta ndalojë angazhimin në një aktivitet tjetër ose të vendosë kushte të veçanta për ngritjen e bizneseve shoqëruese të nevojshëm për të mbrojtur interesat e konsumatorëve. Në rast se i licencuari nuk përmbush kërkesat e përcaktuara nga ERE, ndaj tij mund të merren masa administrative sipas ligjit nr. 43/2015, "Për sektorin e energjisë elektrike", përfshirë heqjen e licencës.

2.11 I licencuari është i autorizuar të vendosë pagesa të aprovuara nga ERE.

2.12 I licencuari nuk është përgjegjës për mospërmbushjen e kushteve të licencës në rast të një force madhore deri në atë shkallë sa forca madhore është shkaku për këtë mospërmbushje të kushteve të licencës. Në këtë rast, i licencuari duhet të njoftojë menjëherë ERE-n dhe të licencuarit e tjerë ose konsumatorët me të cilët i licencuari ka lidhur marrëveshje.

3. Detyrimet e të licencuarit

3.1 I licencuari është i detyruar të zbatojë legjislacionin në fuqi dhe gjithë vendimet e qeverisë dhe rregulloret e rregullat e miratuara nga ERE.

Furnizuesi, në zbatim të kësaj licence, ka detyrimin të furnizojë klientët me energji elektrike, në përputhje me kontratën e nënshkruar, në mënyrë të sigurt, të besueshme dhe efikase.

3.2 Furnizuesi është përgjegjës përballë opera-torit të sistemit të transmetimit për çdo disbalancë të shkaktuar. Përveç rasteve kur Këshilli i Ministrave ka vendosur për përjashtimin nga përgjegjësia për disbalancat, klientët fundorë janë përgjegjës përballë furnizuesit për disbalancat e shkaktuara, sipas akteve nënligjore të miratuara nga ERE për rregullat e balancimit.

3.3 Furnizuesi, përveç detyrimeve të përgjithshme, të përcaktuara në kontratë dhe në kushtet e përgjithshme për vendosjen e detyrimeve të shërbimit publik, të siguruar nga pjesëtari i tregut i ngarkuar me detyrimin e shërbimit publik, informon klientët e tij, për:

a) të drejtën e tyre për të zgjedhur dhe për të ndryshuar pa pagesë furnizuesin, pasi kanë ekzekutuar të gjitha detyrimet e mëparshme të energjisë elektrike;

b) konsumin dhe kostot aktuale të energjisë elektrike, me qëllim mundësimin e menaxhimit të konsumit të energjisë nga ana e klientëve;

c) mënyrat e ndryshme të pagesës, të cilat nuk duhet të jenë diskriminuese midis klientëve. Sistemet e parapagimit, nëse do të aplikohen, duhet të jenë të drejta dhe të reflektojnë konsumin e pritshëm;

ç) mundësinë e përdorimit të procedurave të thjeshta për ndjekjen e ankesave të tyre;

d) ndryshimin e kushteve të kontratës, të paktën 15 ditë përpara zbatimit të tyre, duke përfshirë informacionin në lidhje me të drejtën e klientëve për të zgjedhur në mënyrë të njëanshme kontratën e

furnizimit, me dhënien e njoftimit;

dh) të dhënat e konsumit të tij, duke i mundësuar çdo klienti akses në leximin e aparatit të matjes dhe ndaj të dhënave të matjes, në bazë të një marrëveshjeje të qartë dhe pa pagesë;

e) të drejtat e tyre, në përputhje me udhëzuesin e miratuar nga komuniteti i energjisë.

3.4 Furnizuesit, nëpërmjet faturës së konsumit të energjisë elektrike dhe/apo materialeve promovuese, informon në mënyrë të qartë klientët, për:

- a) konsumin faktik të energjisë elektrike;
- b) të dhëna për çdo burim energjie të siguruar nga furnizuesi gjatë vitit të mëparshëm;
- c) elementet përbërëse të çmimit dhe kostot përkatëse;
- ç) të dhënat për ndikimin në mjedis të gazit karbonik dhe mbeturinave radioaktive të emetuara gjatë prodhimit të energjisë elektrike, të siguruar nga furnizuesi në vitin e mëparshëm.

3.5. I licencuari i ngarkuar sipas ligjit me detyrimin për shërbimin universal do të sigurojë furnizimin me energji elektrike me çmime të rregulluara nga ERE vetëm për klientët fundorë që furnizohen sipas shërbimit universal të furnizimit, sipas parashikimit të nenit 83, pika 1, të ligjit nr. 43/2015, “Për sektorin e energjisë elektrike”.

3.6 I licencuari i caktuar sipas ligjit si furnizuesi i mundësisë së fundit është i detyruar të furnizojë klientët, të cilët mbeten pa furnizues, pas paraqitjes së kërkesës me shkrim, kur:

- a) furnizuesi i mëparshëm është në kushtet e paaftësisë paguese ose është në proces falimentimi;
- b) furnizuesit të mëparshëm i është hequr ose i është pezulluar përkohësisht licenca;
- c) klienti nuk ka arritur të gjejë një furnizues në treg.

3.7 Çmimi me të cilin furnizuesi i mundësisë së fundit furnizon me energji elektrike, përcaktohet nga ERE sipas metodologjisë së miratuar prej saj, në përputhje me përcaktimet e neneve 21 dhe 79, pika 4 e ligjit.

3.8 Të klientit fundor dhe pa kosto shtesë për të. Furnizuesi aktual është i detyruar të furnizojë klientin fundor deri në ndryshimin e furnizuesit.

4. Llogaritë dhe raportimi

4.1 I licencuari do të mbajë regjistra llogarie dhe do të përgatisë bilance financiare, të cilat do të mbahen të ndara për aktivitetin e licencuar dhe çdo aktivitet tjetër (përfshirë aktivitete të tjera të licencuara) ku është angazhuar i licencuari, në përputhje me rregullat e kontabilitetit dhe procedurat e miratuara nga ERE dhe në përputhje me ligjin nr. 43/2015, “Për sektorin e energjisë elektrike”, i licencuari do t’i dorëzojë ERE-s bilance financiare vjetore deri në datën 31 mars të çdo viti.

4.2 Nëse i licencuari parashikon një situatë emergjence, siç përcaktohet nga legjislacioni në fuqi, i licencuari do të njoftojë pa vonesë ERE-n dhe ky njoftim do të përshkruajë çfarë masash do të marrë i licencuari për të parandaluar ose përmirësuar ndikimet e situatës emergjente të parashikuar.

4.3 I licencuari do të ndajë shpenzimet e përbashkëta mes aktivitetit të tij të licencuar dhe tipave të tjerë të aktiviteteve, në përputhje me rregulloret dhe rregullat e ERE-s. I licencuari do t’i paraqesë ERE-s, me kërkesën e tij, në formën dhe në afatin e vendosur nga ERE, dokumentacionin që vendos bazat për ndarjen e shpenzimeve të përbashkëta mes aktiviteteve që do të ushtrohen, si dhe rezultatet e arritura pas kësaj ndarje.

4.4 I licencuari do të njoftojë ERE-n brenda 10 ditëve për çdo ndryshim të:

- a) adresës;
- b) statutit të të licencuarit;
- c) certifikatës së regjistrimit;
- d) kodit fiskal;
- e) organet kryesore drejtuese; ose

Nëse i licencuari nuk e bën këtë njoftim, ERE mund të vendosë gjoba në përputhje me ligjin nr. 43/2015, “Për sektorin e energjisë elektrike”, si dhe rregulloren “Për vendosjen e gjobave dhe kushtet e lehtësimit prej tyre”.

4.5 Gjithë njoftimet zyrtare, aplikimet, petitionet, pretendimet ose korrespondenca tjetër me ERE-n, lidhur me licencën, duhet të jetë me shkrim dhe të nënshkruara respektivisht nga një zyrtar i

autorizuar ose përfaqësues ligjor i caktuar i të licencuarit ose ERE-s dhe të dërgohet me korrier ose postë të regjistruar, duke kërkuar një verifikim të fletës së marrjes. Adresat e Palëve duhet të vendosen mbi zarf. Gjithë njoftimet ose korrespondenca tjetër do të konsiderohen se hyjnë në fuqi nga momenti i dorëzimit ose nëse nuk janë dorëzuar për shkak të gabimit të dërguesit, nga momenti i prezantimit.

4.6 I licencuari do të dërgojë në ERE informacion periodik lidhur me:

- i) shpenzimet dhe të ardhurat operative (mujore dhe në progresion 3-mujor);
- ii) pasqyra *Cash-Flow* (mujore dhe progresive);
- iii) tabela e energjisë elektrike të furnizuar (mujore dhe progresive);
- iv) çdo informacion të kërkuar rast pas rasti nga ERE;
- v) numrin e klientëve të furnizuar (mujore dhe progresive);
- vi) grafikët e ngarkesës;
- vii) sistemet e matjes;
- viii) të dhëna mbi ankesat e regjistruara, trajtimit dhe korrektimeve në faturimet përkatëse objekt ankimi (mujore dhe progresive).

5. Përdorimi i informacionit

5.1 I licencuari do të sigurojë që çdo informacion i marrë si rezultat i aktivitetit të tij të licencuar nuk do t'i jepet askujt, me përjashtim të rasteve kur:

- a) jepet pëlqim paraprak me shkrim i personit me të cilin lidhet informacioni;
- b) informacioni është bërë publik;
- c) kur të licencuarit i kërkohet ose lejohet të përhapë informacionin për të përmbushur kushtet e kësaj licence sipas një urdhri të ERE-s ose çdo dispozitë ligjore të aplikueshme;
- d) informacioni duhet përhapur në funksion të kryerjes së aktivitetit të licencuar.

5.1.1 I licencuari do të sigurojë që çdo biznes shoqërues nuk do të përdorë asnjë informacion të të licencuarit për të fituar një avantazh konkurrues të pajustificuar dhe do të sigurojë që nuk do të përhapë asnjë informacion të ndonjë person tjetër (përfshirë biznese të tjera shoqërues), që mund ta mundësojnë këtë person të fitojë çdo lloj përfitimi komercial të pajustificuar.

5.2 I licencuari do të ndërmarrë çdo hap të nevojshëm për ta ruajtur konfidencial informacionin në posedim të tij dhe për t'i raportuar ERE-s në përputhje me detyrimet ligjore.

5.2.1 Informacioni i dërguar ERE-s nga i licencuari do të konsiderohet publik me përjashtim të rasteve kur me kërkesë specifike të të licencuarit, ERE, me vendim përcakton që ky informacion është i natyrës pronësore dhe përhapja e tij nuk i shërben interesit publik.

5.2.2 I licencuari nuk do të hyjë në marrëveshje, të cilat i licencuari e di ose duhet ta dijë që çojnë në shkelje të kushteve të licencës.

5.2.3 I licencuari do të respektojë ligjet dhe vendimet e qeverisë së Republikës së Shqipërisë dhe rregulloret e rregullat e ERE-s.

6. Pagesat e rregullimit

6.1 I licencuari do t'i paguajë ERE-s pagesa rregullimi në mënyrë të rregullt dhe të vazhdueshme gjatë afatit të kësaj licence, siç përcaktohet nga ERE në rregulloren "Për pagesat e rregullimit", siç është përcaktuar në nenin 17, të ligjit nr. 43/2015, "Për sektorin e energjisë elektrike".

6.2 Nëse i licencuari nuk i paguan ERE-s pagesat e rregullimit, brenda afatit të përcaktuar nga ERE, i licencuari do të penalizohet në përputhje me ligjin nr. 43/2015, "Për sektorin e energjisë elektrike".

7. Kontrolli mbi kryerjen e aktivitetit të licencuar

7.1 ERE do të monitorojë zbatimin nga i licencuari të kushteve të licencimit, do të shqyrtojë raportet e marra nga i licencuari dhe në çdo kohë pas njoftimit, është i autorizuar të inspektojë asetet ose regjistrimet e llogarive dhe mund të kërkojë një auditim teknik dhe/ose kontabël të aktiviteteve të të licencuarit.

7.2 Përfaqësuesit e autorizuar të ERE-s kanë të drejtë të hyjnë në ndërtesat e të licencuarit, pajisjet dhe dokumentet për të monitoruar aktivitetin e licencuar në përputhje me rregulloret dhe rregullat e ERE-s. I licencuari do të sigurojë çdo informacion ose dokument të kërkuar, të nevojshme

për ERE-n gjatë këtij monitorimi.

7.3 Në bazë të ankesës së vërtetuar të çdo personi të tretë ose në bazë të vetë propozimit të tij, ERE mund të nisë një hetim për zbatimin e kushteve të licencës ose rregulloreve dhe rregullave të ERE-s, përfshirë shqyrtimin e praktikave të biznesit nga të licencuarit lidhur me aktivitetin e licencuar.

7.4 Nëse pas hetimit, ERE konkludon se i licencuari nuk ka zbatuar kushtet e licencës dhe legjislacionin në fuqi. ERE mund të korrigojë tarifat e të licencuarit të ngarkuar me përgjegjësinë e furnizuesit universal dhe/ose të ndërmarrë masa të tjera ndaj të licencuarit, sipas kësaj licence me qëllim që të mbrojë interesat e konsumatorëve të energjisë elektrike, duke ndëshkuar atë me gjobë e deri në heqjen e kësaj licence.

7.5 I licencuari do të informojë ERE-n për çdo shkelje të këtyre kushteve të licencës dhe legjislacionit në fuqi brenda një jave që kjo shkelje i bëhet e njohur të licencuarit.

7.6 I licencuari do të zbatojë të gjitha urdhë-rimet apo vendimet e nxjerra nga ERE, përfshirë pagesën e plotë të gjobave të vendosura nga ERE.

8. Amendamenti i licencës

8.1 ERE mund të amendojë kushtet e licencës në rast se ato nuk përputhen, me:

a) Legjislacionin në fuqi dhe vendimet e qeverisë së Republikës së Shqipërisë që janë në përputhje me legjislacionin në fuqi;

b) Vendimet e nxjerra nga Gjykata e Shkallës së Parë Tiranë ose një gjykatë tjetër shqiptare me kompetencë juridiksionale.

8.2 Në çdo kohë i licencuari ose ERE mund të propozojnë amendamente të tjera për këto kushte licence, duke i transmetuar palës tjetër një propozim me shkrim, së bashku me dokumentet mbështetëse.

8.3 ERE do të marrë vendimin përfundimtar vetëm pasi të marrë në konsideratë interesat e konsumatorëve dhe të të licencuarve të tjerë. Palët e interesuara do të informohen me shkrim për çdo amendament të propozuar. Nëse ERE dhe i licencuari arrijnë një marrëveshje për këto amendamente, kushtet e licencës do të amendohen. Nëse marrëveshja nuk arrihet, i licencuari mund të apelojë në Gjykatën e Shkallës së Parë Tiranë.

8.4 Amendamentet e bëra në kushtet e licencës do të publikohen në Fletoren Zyrtare të Republikës së Shqipërisë 30 (tridhjetë) ditë para se të hyjnë në fuqi.

9. Përfundimi i licencës

9.1 ERE mund ta përfundojë licencën në përputhje me ligjin nr. 43/2015, kur:

a) i licencuari kërkon revokimin e licencës;

b) i licencuari shkel kushtet e licencës;

c) i licencuari shkel legjislacionin në fuqi;

d) i licencuari deklarohej i falimentuar dhe është i paaftë të përmbushë detyrimet e kushteve të licencës;

e) i licencuari ka marrë licencë duke mashtruar;

f) kur kontraktin me të tretë për dhënien e shërbimit sipas aktivitetit të licencuar.

9.2 Nëse i licencuari ndryshon statusin e tij ligjor ose aksionari/ortaku që kontrollon interesin ndryshohet pa autorizimin e ERE-s, licenca bëhet nul (e pavlefshme) ose anulohet dhe pasuesi i të licencuarit do të aplikojë për një licencë të re në përputhje me procedurat e ERE-s për dhënie licence.

10. Zgjidhja e mosmarrëveshjeve dhe e drejta për apelim

10.1 Çdo çështje e diskutueshme ose kërkesë mes të licencuarit dhe çdo pjesëmarrësi tregu do të zgjidhet sa më shumë që të jetë e mundur me mirëkuptim, në përputhje me legjislacionin në fuqi dhe rregulloret dhe rregullat e ERE-s.

10.2 Nëse zgjidhja nuk arrihet me mirëkuptim, atëherë ERE, në bazë të kërkesës së çdo personi që është palë në këtë mosmarrëveshje do ta zgjidhë mosmarrëveshjen dhe do të nxjerrë vendimin e tij në përputhje me legjislacionin në fuqi dhe rregulloret dhe rregullat e saj.

10.3 I licencuari mund të apelojë kundër vendimeve të ERE-s në Gjykatën Administrative Tiranë.

Republika e Shqipërisë
Enti Rregullator i Energjisë

LICENCË
PËR PRODHIMIN E ENERGJISË ELEKTRIKE

Numri i licencës:

Certifikata e regjistrimit:

Seria:

Data e hyrjes në fuqi:

Licenca i jepet:

Shoqëria:

NUIS:

Detyrimi për shërbimin publik: _____

Data e hyrjes në fuqi:

Kohëzgjatja:

Bazuar në autoritetin që i është dhënë në pjesën e pestë të ligjit nr. 43/2015, “Për sektorin e energjisë elektrike”, Enti Rregullator i Energjisë (ERE) i jep këtë licencë prodhimi (licenca), për të kryer aktivitetin e prodhimit të energjisë elektrike (PEE) ose/dhe për të përmbushur detyrimin e shërbimit publik/universal, personit të lart-përmendur, i quajtur “i licencuari”, subjekt i kushteve të kësaj licence, si dhe kushteve të përcaktuara në vendimin e Bordit të ERE-s. Kjo licencë hyn në fuqi në datën e shkruar më lart dhe do të vazhdojë të jetë në fuqi për një periudhë prej, në rast se nuk përfundohet ose pezullohet nga ERE-ja në përputhje me kushtet e licencës të përfshira këtu.

KRYETARI I ERE-s